

- मुख्यमंत्री भजनलाल शर्मा झालावाड़-मनोहरथाना स्कूल हादसा री आला दर्जा री जांच रा हुकम दीना-हादसा रे कारण मरण वाळा बच्चां री तादाद बध र सात व्हीं
- प्रदेश मांय टी.बी. रा मरीजां ने 27 जुलाई ऊं निक्षय पोषण किट बांट्या जावेलां
- प्रधानमंत्री नरेन्द्र मोदी भारत अर मालदीव बीच एक-दूजा री मदद अर निवेश माथे जोर दीनों
- करगिल विजय दिवस री 26वीं वर्षगांठ रे मौके काल देश भर मांय जांबाज फौजियां ने नमन कर्यो जावेलां

000

मुख्यमंत्री भजनलाल शर्मा झालावाड़ जिला रा मनोहरथाना री सरकारी स्कूल मांय व्ह्या हादसा री आला दर्जा री जांच रा हुकम दीना हैं मुख्यमंत्री कह्यो के ई हादसा रा जिम्मेदार लोगां रे खिलाफ करडी कार्रवाई करी जावेलां वे कह्यो के प्रदेश री कोई स्कूल जर्जर हालत मांय नी व्हेवणी चाहिजें

.....

ई बीच हादसा मांय मरण वाळा री तादाद बध र सात व्हे गयी हैं झालावाड़ रा एस.पी. अमित कुमार आकाशवाणी ने बतायो के पीपलोदी गांव री सरकारी स्कूल मांय आज संवारे छत पड़ जावण व्ह्या हादसा मांय जख्मी 12 बच्चां रो झालावाड़ मेडिकल कॉलेज मांय ईलाज चाल रह्यो है जद के नौ बच्चा दूजा अस्पतालां मांय भर्ती हैं घणा जख्मी दो बच्चां ने आईसीयू मांय भर्ती करी ज्या हैं शिक्षा मंत्री मदन दिलावर कह्यो के फिलहाल जख्मी बच्चां रो टेमसर ईलाज करावण माथे खास ध्यान हैं वे कह्यो के मामला री पूरी जांच करायी जावेलां शिक्षा मंत्री बतायो के ई मामला मांय पांच अध्यापकां अर प्रबोधक ने मुअत्तल कर दिया ज्या हैं

.....

केन्द्रीय शिक्षा मंत्री धर्मेन्द्र प्रधान ई मुख्यमंत्री भजन लाल शर्मा अर शिक्षा मंत्री मदन दिलावर ने फोन कर र राहत रा कामां अर जख्मी बच्चां रा ईलाज री जाणकारी लीनीं राष्ट्रपति द्रौपदी मुर्मू अर प्रधानमंत्री नरेन्द्र मोदी हादसा माथे गहरो दुःख जतायो हैं वे दुःखी पिरवारां सारु सहन शक्ति री कामना करता थकां जख्मी बच्चां रे बेगा ई ठीक व्हेवण री प्रार्थना कीनीं पैली वाळा मुख्यमंत्री वसुंधरा राजे अर अशोक गहलोत समेत कई नेता स्कूल हादसा माथे दुःख जतायो हैं

000

टी.बी. मुक्त राजस्थान कार्यक्रम रा तैत 27 जुलाई ऊं 31 जुलाई तांई निक्षय पोषण किट बांटण रो अभियान चलायो जावेलां चिकित्सा विभाग री प्रमुख शासन सचिव गायत्री राठौड़ बतायो के अभियान रा तैत टी.बी. रा मरीजां ने जनता री मदद ऊं खाण-पीण री पौष्टिक चीजां मुहैया करायी जावेलां

चिकित्सा विभाग रा जन स्वास्थ्य निदेशक डॉ. रवि प्रकाश शर्मा आज अभियान री तैयारियां रा बारा मांय वीडियो कॉन्फ्रेंसिंग रे जरिये अहलकारां सागे मीटिंग कीनीं डॉ. शर्मा ई अभियान ने जनता रो आंदोलन बणावण बाबत् कह्यो

000

उद्योग अर खेल मंत्री कर्नल राज्यवर्द्धन सिंह राठौड़ पारम्परिक भारतीय शिक्षा मूल्यां ने ओजू अपणावण माथे जोर दीनो हैं श्री राठौड़ आज कोटपूतली मांय राख्यी ज्या एक कार्यक्रम मांय बोल रह्या हां वे गुरु शिष्य परम्परा ने शिक्षा व्यवस्था री असली बुनियाद बतायीं वे कह्यो के आगे बढ़बा सारु हर किण ई ने गुरु री जरूरत व्हे हैं खबरनवीसां सागे बातचीत करता थकां वे कह्यो के राज्य मांय निवेश री अपार संभावनावां हैं उद्योग मंत्री कह्यो के सरकार ईज ऑफ डूइंग बिजनेस ने बधावो दीनो हैं

000

संसदीय कार्य मंत्री जोगाराम पटेल आज जोधपुर मांय सुरपुरा बंधा रो दौरा कर र वां मांय पाणी रा लेवल री जाणकारी लीनीं वे कह्यो के सुरपुरा बंधा ने सैर-सपाटा री ठौड़ा रा तौर ऊं विकसित कर्यो जावेलां श्री पटेल ई सारु अहलकारां ने बंधा हलकां मांय सड़कां बणावण अर बिजली री

ज़रूरी व्यवस्था सारू कार्य योजना बणावण रा हुकम दीनां वे जोधपुर मांय आवता बगत री पाणी री ज़रूरत ने ध्यान राखता थकां उम्मेद सागर माथे न्यारो प्रोजेक्ट बणावण बाबत् ई कह्यो वे कह्यो के केन्द्र सरकार जल जीवन मिशन री मियाद साल 2028 ताई बधा दीनी है जिण ऊं जेजेएम रा तैत चाल रही परियोजनावां रो काम पूरो व्हेला अर हर घर ताई नळ रे जरिये पाणी पूगेलां

000

प्रधानमंत्री नरेन्द्र मोदी आज मॉलदीव रा राष्ट्रपति मोहम्मद मुइज़्ज़ू सागे मॉलदीव री राजधानी माले मांय प्रतिनिधिमंडल स्तर री बातचीत कीनीं इण मांय प्रधानमंत्री नरेन्द्र मोदी, मॉलदीव रा राष्ट्रपति मोहम्मद मुइज़्ज़ू, भारत रा विदेश मंत्री सुब्रह्मण्यम जयशंकर, राष्ट्रीय सुरक्षा सलाहकार अजीत डोभाल अर दोन्यू देशां रा आला अहलकार शामिल व्हां इण ऊं पैली प्रधानमंत्री मोदी अर राष्ट्रपति मुइज़्ज़ू एक-दूजा रा भला ऊं जुड़्या न्यारा-न्यारा मुद्दा माथे बातचीत कीनीं प्रधानमंत्री मोदी दोन्यू देशां बीचे आपसी मदद री योजनावां रो जिक कीनीं

.....

इण ऊं पैली मालदीव पूगण परां श्री मोदी ने गार्ड ऑफ ऑनर दियो ज्यों ई दौरान स्कूली बच्चा सांस्कृतिक कार्यक्रम पेश कीनां वे मॉलदीव मांय रह रह्या भारतीय समुदाय रा लोगां सागे ई बातचीत कीनीं प्रधानमंत्री मोदी रो ओ मॉलदीव रो तीजो दौरा हैं श्री मोदी रो काल मालदीव रा साठवां राष्ट्रीय दिवस समारोह मांय खास पावणा रा तौर ऊं सिरकत करण रो कार्यक्रम हैं

000

देश मांय नौकरी-धंधा रा साढे तीन करोड़ ऊं बत्ता मौका बणावण रा मकसद ऊं एक अगस्त ऊं प्रधानमंत्री विकसित भारत रोजगार योजना लागू करी जावेलां दो साल ताई चालण वाळी करीब एक हजार करोड़ रुपया री पी.एम.वी.बी.आर.वाई मांय करीब एक करोड़ बानवे लाख लोगां ने शामिल कर्या जावेलां योजना का फायदो पहली दफा नौकरी लागण वाळां ने मिलेलां

000

भारत निर्वाचन आयोग उपराष्ट्रपति ओहदा माथे चुणाव री प्रक्रिया सरू कर दीनी हैं ई सारू राज्यसभा रा महासचिव पी.सी. मोदी ने चुणाव अधिकारी बणायी ज्या हैं राज्यसभा सचिवालय री संयुक्त सचिव गरिमा जैन अर निदेशक विजय कुमार ने सहायक रिटर्निंग अधिकारी बणायी ज्या हैं

000

लोकसभा अध्यक्ष ओम बिरला संसद रा मॉनसून सत्र रे दौरान सदन री कार्यवाही ठीक ढंग ऊं चलावणो तैय करण सारू आज लोकसभा मांय सगळी पार्टियां सागे मीटिंग कीनीं मीटिंग मांय सोमवार ऊं सुचारू कार्यवाही चलावण बाबत् एक राय बणायी ज्यीं श्री बिरला कह्यो के सदन री कार्यवाही चालण परां ई प्रश्नकाल रे दौरान चर्चा संभव हैं

000

पाकिस्तान रे खिलाफ व्ही करगिल री लड़ाई मांय जीत हासिल करण री काल 26वीं वर्षगांठ हैं साल 1999 मांय इण ई दिन भारत री फौज ऑपरेशन विजय री कामयाबी रो ऐलाण कीनो हों ई मौके लद्दाख रा द्रास मांय केन्द्रीय युवा मामलात् अर खेल मंत्री डॉ. मनसुख मांडविया री अगुवाई मांय पदयात्रा निकाळी जावेलां ई सागे ई देशभर मांय न्यारा-न्यारा कार्यक्रम राख्या जावेलां हर साल 26 जुलाई ने करगिल विजय दिवस मनायो जावे हैं ओ दिन वां अमर जांबाज जवानां री बहादुरी ने सलाम करण रो दिन है, जो करीब 18 हजार फीट री ऊंचाई माथे पाकिस्तानी घुसपैठियां रे खिलाफ लड़्या हां आ फौजी इतिहास री मुश्किल लड़ाइयां मांय ही, जो इतरी ऊंचाई अर तोलोलिंग अर टाइगर हिल सरीखा मुश्किल हलकां मांय लड़ी ज्यी हीं फौजियां री अद्भुत हिम्मत ने समर्पित ई दिन केई आयोजन व्हे हैं ई सिलसिला मांय आज द्रास रा लामोचन व्यू पॉइंट माथे खास कार्यक्रम राख्यी ज्यों राजस्थान विधानसभा परिसर मांय ई अमर शहीदां री याद मांय शौर्य वाटिका बणायी ज्यी हैं विधानसभा अध्यक्ष वासुदेव देवनानी इण रो उद्घाटन कीनीं ई मौके सिंदूर रो पौधो रोप र बलिदानी फौजियां ने याद करी ज्या अर वीरांगनावां रो मान करी ज्यों

000

लोकपर्व तीज 27 जुलाई ने मनायो जावेलां ई मौके राजधानी जयपुर मांय पर्यटन विभाग री ओर ऊं तीज री सवारी शाही लवाजमा सागे निकाळी जावेलां इण ऊं पैली काल सिंजारो मनायो जावेलां जयपुर नगर निगम हेरिटेज री ओर ऊं काल सिंजारा महोत्सव राख्यो जावेलां

प्रदेश मांय आज व्ह्या न्यारा-न्यारा सड़क हादसां मांय दस जणां री मौत व्हे गयी अर केई जणा जखमी व्हे ग्यां करौली जिला मांय गुडला गांव कने पिकअप अर कार री आमी-सामी री टक्कर रे कारण चार महिलावां री मौत व्हे गयीं हादसा मांय घणा जखमी एक जणा ने जयपुर रैफर करी ज्यो है जद के 8 जणां ने करौली रा जिला अस्पताल मांय भर्ती करायी ज्यो हैं मरण वाळी सगळी महिलावां हिंडौन उपखण्ड रा बेड़ा बनकी गांव री रहवासी हीं श्रीगंगानगर मांय श्रीकरणपुर कने गजसिंहपुर रोड माथे आज मोटरसाइकिल रे ट्रक री फेंट मांय आ जावण ऊं दो मोट्यारां री मौत व्हे गयीं सिरोही मांय ई दो न्यारा न्यारा हादसा मांय दो जणां री मौत व्हे गयीं पुलिस जांच कर रही हैं राजसमंद जिला रा देवगढ़ हलका मांय एक दोपहिया वाहन रे ट्रेलर री फेंट मांय आ जावण ऊं लोग-लुगाई रा एक जोड़ा री मौत व्हे गयीं

000

मुख्य निर्वाचन अधिकारी नवीन महाजन वोट देवण वाळां री शंकावां दूर करण माथे खास ध्यान देवण सारू कह्यो हैं श्री महाजन वोटर लिस्टां रा विशेष गहन पुनरीक्षण कार्यक्रम अर चुनाव ऊं जुड़ी तैयारियां रो जायजो लेवण सारू आज वीडियो कॉन्फ्रेंस रे मार्फत अहलकारां सागे मीटिंग कीनीं मीटिंग मांय जोधपुर संभाग रा संभागीय आयुक्त अर बालोतरा, बाड़मेर, जोधपुर, जैसलमेर, जालौर, पाली अर फलौदी रा जिला निर्वाचन अधिकारी अर अधीनस्थ निर्वाचक रजिस्ट्रीकरण अधिकारी सिरकत कीनीं श्री महाजन अहलकारां ने अस्पतालां अर स्कूल कॉलेजां मांय हेल्प-डेस्क लगावण बाबत् ई कह्यो

000

आकाशवाणी ऊं हर महीना प्रसारित कर्यो जावण वाळो प्रधानमंत्री नरेन्द्र रो खास कार्यक्रम **मन की बात** ई दफा 27 जुलाई ने व्हेलां आ ई कार्यक्रम री 124वीं कड़ी व्हेलां ओ कार्यक्रम आकाशवाणी अर दूरदर्शन रा पूरा नेटवर्क माथे प्रसारित कर्यो जावेलां कार्यक्रम ओटीटी प्लेटफॉर्म वेब्ज माथे ई सुण्यो जा सकेलां

000